

景明刻本古今逸史

竹書紀年卷上

梁 沈 約附註

明 吳 琯 校

黃帝軒轅氏

母曰附寶見大電繞北斗樞星光照郊野感而孕
二十五月而生帝於壽丘弱而能言龍顏有聖德
効百神朝而使之應龍攻蚩尤戰虎豹熊羆四獸
之力以女魃止淫雨天下既定聖德光被羣瑞畢
臻有屈軼之草生於庭佞人入朝則草指之是以
佞人不敢進

元書紀年 卷上
元年帝卽位居有熊○初制冕服

二十年景雲見以雲紀官

有景雲之瑞赤方氣與青方氣相連赤方中有兩
星青方中有一星凡三星皆黃色以天清明時見
於攝提名曰景星帝黃服齋于中宮坐于玄扈洛
水之上有鳳凰集不食生蟲不履生草或止帝之
東園或巢於阿閣或鳴於庭其雄自歌其雌自舞
麒麟在囿神鳥來儀有大螻如羊大螾如虹帝以
土氣勝遂以土德王

五十年秋七月庚申鳳鳥至帝祭于洛水

庚申天霧三日三夜晝昏帝問天老力牧容成曰
於公何如天老曰臣聞之國安其主好文則鳳凰
居之國亂其主好武則鳳凰去之今鳳皇翔於東
郊而樂之其鳴音中夷則與天相副以是觀之天
有嚴教以賜帝帝勿犯也召史卜之龜焦史曰臣
不能占也其問之聖人帝曰已問天老力牧容成
矣史北面再拜曰龜不違聖智故焦霧旣降游于
洛水之上見大魚殺五牲以醺之天乃甚雨七日
七夜魚流於海得圖書焉龍圖出河龜書出洛赤
文篆字以授軒轅接萬神於明庭今塞門谷口是

也

五十九年貫胥氏來賓○長股氏來賓

七十七年昌意降居若水產帝乾荒

一百年地裂○帝陟

帝王之崩皆曰陟書稱新陟王謂新崩也帝以土德王應地裂而陟葬羣臣有左徹者感恩帝德取衣冠几杖而廟饗之諸侯大夫歲時朝焉

約按帝摯少昊氏毋曰女節見星如虹下流華渚旣而夢接意感生少昊登帝位有鳳皇之瑞或曰名清不居帝位帥鳥師居西方以鳥紀官

帝顓頊高陽氏

母曰女樞見瑤光之星貫月如虹感已於幽房之宮生顓頊於畚水首戴干戈有聖德生十年而佐少昊氏二十而登帝位

元年帝卽位居濮

十三年初作曆象

二十一年作承雲之樂

三十年帝產伯鯀居天穆之陽

七十八年帝陟○術器作亂辛侯滅之

帝嚳高辛氏

生而駢齒有聖德初封辛侯代高陽氏王天下使鼓人拊鞀鼓擊鐘磬鳳皇鼓翼而舞

元年帝卽位居亳

十六年帝使重帥師滅有劓

四十五年帝錫唐侯命

六十三年帝陟

帝子摯立九年而廢

帝堯陶唐氏

母曰慶都生於斗維之野常有黃雲覆其上及長觀于三河常有龍隨之一旦龍負圖而至其文要

曰亦受天祐眉八彩鬚髮長七尺二寸面銳上豐
下足履翼宿旣而陰風四合赤龍感之孕十四日
而生堯於丹陵其狀如圖及長身長十尺有聖德
封於唐夢攀天而上高辛氏衰天下歸之

元年丙子帝卽位居冀○命羲和曆象

五年初巡狩四岳

七年有麟

十二年初治兵

十六年渠搜氏來賓

十九年命共工治河

二十九年春焦僥氏來朝貢沒羽

四十二年景星見于翼

五十年帝遊于首山乘素車玄駒

五十三年帝祭于洛

五十八年帝使后稷放帝子朱於丹水

六十一年命崇伯鯀治河

六十九年黜崇伯鯀

七十年春正月帝使四岳錫虞舜命

帝在位七十年景星出翼鳳皇在庭朱草生嘉禾
秀甘露潤醴泉出日月如合璧五星如聯珠厨中

自生肉其薄如箴搖動則風生食物寒而不臭名曰箴脯又有草莢階而生月朔始生一箴月半而生十五莢十六日以後日落一莢及晦而盡月小則一莢焦而不落名曰莫莢一曰曆莢洪水旣平歸功於舜將以天下禪之乃潔齊修壇場於河洛擇良日率舜等升首山遵河渚有五老游焉蓋五星之精也相謂曰河圖將來告帝以期知我者重瞳黃姚五老因飛爲流星上入昴二月辛丑昧明禮備至於日昃榮光出河休氣四塞白雲起回風搖乃有龍馬銜甲赤文綠色緣壇而上吐甲圖而

去甲似龜背廣九尺其圖以白玉爲檢赤土爲
泥似黃金約以青繩檢文曰闔色授帝舜言虞夏
當授天命帝乃寫其言藏於東序後二年二月仲
辛率羣臣沈璧于洛禮畢退俟至于下昃赤光起
玄龜負書而出背甲赤文成字止壇其書言當禪
舜遂讓舜

七十一年帝命二女嬪于舜

七十三年春正月舜受終于文祖

七十四年虞舜初巡狩四岳

七十五年司空禹治河

七十六年司空伐曹魏之戎克之

八十六年司空入覲贊用玄圭

八十七年初建十有二州

八十九年作游宮于陶

九十年帝游居于陶

九十七年司空巡十有二州

一百年帝陟于陶

帝子丹朱避舜于房陵舜讓不克朱遂封于房爲

虞賓三年舜卽天子之位

帝舜有虞氏

母曰握登見大虹意感而生舜於姚墟目重瞳子
故名重華龍顏大口黑色身長六尺一寸舜父母
憎舜使其塗廩自下焚之舜服鳥工衣服飛去又
使浚井自上填之以石舜服龍工衣自傷而出耕
於歷夢眉長與髮等遂登庸

元年己未帝卽位居冀○作大韶之樂

卽帝位冀莢生於階鳳凰巢於庭擊石拊石以歌
九韶百獸率舞景星出于房地出乘黃之馬

三年命臯陶作刑

九年西王母來朝

西王母之來朝獻白環玉玦

十四年卿雲見命禹代虞事

在位十有四年奏鐘石笙管未罷而天大靄雨疾
風登屋拔木桴鼓播地鐘 亂行舞人頓伏樂正
狂走舜乃 堵持衡而笑曰明哉天下非一人之
天下也亦乃見于鐘石笙箎乎乃薦禹於天使行
天子事也于時和氣普應慶雲興焉峇烟非烟峇
雲非雲郁郁紛紛蕭索輪囷百工相和而歌卿雲
帝乃倡之曰慶雲爛兮禮縵縵兮日月光華旦復
旦兮羣臣咸進頌首曰明明上天爛然星陳日月

光華弘于一人帝乃再歌曰日月有常星辰有行
四時從經萬姓允誠於予論樂配天之靈遷于聖
賢莫不咸聽饗乎鼓之軒乎舞之精華以竭褰裳
去之於是八風循通慶雲叢聚蟠龍奮迅於其藏
蛟魚踊躍於其淵龜鼈咸出其穴遷虞而事夏舜
乃設壇於河依堯故事至于下昃榮光休至黃龍
負圖長三十二尺廣九尺出于壇畔赤文緣錯其
文言當禪禹

十五年帝命夏后有事于太室

十七年春二月入學初用萬

二十五年息慎氏來朝貢弓矢

二十九年帝命子義鈞封于商

三十年葬后育于渭

三十二年帝命夏后總師遂陟方岳

三十三年春正月夏后受命于神宗遂復九州

三十五年帝命夏后征有苗有苗氏來朝

四十二年玄都氏來朝貢寶玉

四十七年冬隕霜不殺草木

四十九年帝居于鳴條

五十年帝陟

義鈞封于商是謂商均后育娥皇也鳴條有蒼梧
之山帝崩遂葬焉今海州

帝禹夏后氏

母曰脩已出行見流貫昴夢接意感既而吞神珠
脩已背剖而生禹於石紐虎鼻口兩耳參鏤首戴
鉤鈐胸有玉斗足文履已故名文命長有聖德長
九尺九寸夢自洗於河取水飲之又有白狐九尾
之瑞當堯之世舜舉之禹觀於河有長人白面魚
身出曰吾河精也呼禹曰文命治水言訖授禹河
圖言治水之事乃退入于淵禹治水既畢天錫玄